

Cheeti da Pawlo sa Tiito Gimba guri giyaada

Tiito yaa Yunaanimo, ina gi /imba Yeesu. Da hhe'esi gi iliay ya/abimiisay Pawlo hhiyumu midu gosii wa/a gu kakaaru Gimba gu Hhou gu Yeesu Kristu. Qariqaaqari Pawlo gwaa ya/abi Tiito hhaapee da Kireetege, ma giyaadimiisay gu kanisasuu gu yada tleehhidi.

Cheetitii Pawlo hiti kakaakana sa Tiito, ma hiileehhi hida gu koomee ibinaa da hhoi gu giyaadimiisee da kanisasuu tleehhidee. Slime Pawlo hitii gadiidina Tiito, idoo gi iliicaacaah-hamisiye raqoo paslaapasloo kanisaage, gaduũ gu hhawatee, gaduũ gu tigay, qaraiya haa tongee. Hiigaasooge ina hitii slaslaaslay sa Tiito tuba, hida goõ goó /imbee Kristu kwanda gi ibiidiyee hari qasaw haa daakaiimaa. Slime, kwanda gii /ipiyee wakitimee, kabaaba/u hari gimba haa deehhoo tla/aã gooinay.

Cehheemisuu gu Pawlo daqa Tiitoge

¹ Ana Pawlo, tongimoo gu Iliitleemu haa ya/abimiisay gu Yeesu Kristu, ana dinaati ya/abi daqa hida daa hiileehhige ha Iliitleemu, magiri giyaadi, ma slayri /imba daqa Kristuge haa ma caahhiri gimba gu lou, gungoó sirakomamida haa ibinaa da kooma muree pandaa da Iliitleemuge. ² Laqiyee teesaaqay iliipa'aru gu ibinaa da taysa naqatloo, daa uumi ha Iliitleemu,

daa ilii kahhiye ma tlaatleesoo da khoodoti see.
Gu lou, Iliitleemu yoóyii coriyaaba coko'o see!

³ Inkoo Iliitleemu Ilabu'umiisay goori, qatlay
giyaa hiileehhige, yaa hiitlaa'asi Gimba gu Hhou
gu Yeesu, hari amoo da kakaaru ha hida. Kara
hari ilakaawaraa dosi haa ooyi yondukee sa ina.

⁴ Cheetiti sagaani ugu handikimi, Tiito,
ugu ti nankoy pahha daqa dooi,
gonkootaa hoó sliimaa Ámbana Kristu
Yeesu.

Ana ha firiirima Taataa goori Iliitleemu haa
Kristu Yeesu,
Ilabu'umiisay goori sugu laqane hhoínay gu
didiru haa qasaw,
kara sugu qayee ibinaa da hhoi.

Yondu gu Tiito yade Kireetege

⁵ Idoó sugwaa may ugu taysi Kireetege, ana
haati sla'a ugu, ma ilakonti tafa'amisu gimba
sliimaa gwaa kahha tafaafau kanisasuuge, kara
ma hiileehhedi gaduũ gu kanisaa yaamu sli-
imaage. ⁶ Gaduwaa gu kanisaa kwanda ti heedi
gu kooma ibinaa da hhoi, doóba ilii kaawaraa
dakoo lensee haa hhawata gu hadee leë kilesi.
Kara ti heedi ya'ay kosi see goó Ámbee Kristu,
digi hhanti arina tlakwaroo ubee, ya'ay hhaka'a
pahha goóba ilamuree, kara goóba gwaa/amee.

⁷ Lawaalimoo* kwanda ti heedi doóba ilii
kaawaraa dakoo lensee, sa gimba ina dugunoó
iliipa'ana yondu gu Iliitleemuge. Ina hingi
hhanti arina ina na ina, heedi goóba cira slah-
haa'a, oonimiisay gooba, gu waka qwatla haa

* **1:7** 1:7 Lawaalimoo: Angamalee na Askoofu.

hida, hhanti heedi gu kooma slahhaahhaau, hhanti slaslay idadu hari amamu gu tlakwi. ⁸ Ba/ay ti heedi gwaa cabuudu tleehhidiye, gu sla'a gimba gu hhou, goó ilahudeesa hingigi ga/ay nara'a, gu kooma ibinaa daa tafa'adi, gwaa tlinti'isu ibinaa dosi sa Iliitleemu, hingirigii kiki'i hari waaway. ⁹ Ina kwanda gi ooyiye nara'a caacaahhamisu gu lou gu Iliitleemu, doó iliipa'ane, qatlay dugwaa ilii caacaahhamisi gooay. Teesaaqay hiidahhasi hii/atlisa muunaii gu hida wakinay, kara ilii/oo/i hida hhanki goó tlatlankimee gimbakee, ma sigi laqami dakoo dooina.

¹⁰ Hati gimaamisa gimbaki, sa gimba wanay hida wa/a goóba itatiimisu Iliitleemu, gwaa hacee gimba guba amoo haa goóyii coridee hida wakinay. Gimbaki dugoóti yondiidi loi ha raqata'a da hida doó iliikooma daba/u.† ¹¹ Hida hhakee kwanda gi qabiqabaside sumuku, sa gimba inay hiicoraaridiyay hida gu maraai wa/a, hari amoo da caacaahhamisu, gimbaka'a inay giraa hiiboo'riiba caacaahhamisu. Kara yoóti teesaaqay lalaqiyay hari amoo doóba muree, ma slayri hindagaruumaa da ilamuree. ¹² Gimati tletimiisay gooina gu didiri gu kooma waaway yaa kaay tuba,

“Hida gu Kireete balalu sliimaa yaati afa'afuumidiri ubee, makay gu dihhi, gwaa buhhuumidee, kara gwaa naa/amuumuudee.”

† **1:10** 1:10 raqata'a da hida doó iliikooma daba/u: Wayahuudi gwaa iliipa'amee Kristu, gwaa iliikoomee iliiqamiduu sariyaa da daba/u da diini dooina da Yahuudi.

¹³ Gimbaki daa arimi guti lou lou. Teesaaqay kwanda ga ilii/oo/odee hari dihhay hida hhakee, ma qadidiri nara'a /imbage Kristu. ¹⁴ Kara ilii/oo/akii inay, ma mayri itatiimisu gu catimisu gu hida gu Yahuudi haa ilakaawa da hida goó tlatlankimee caacaahhamisu gu lou.

¹⁵ Idadu sliimaa guti hhoi daqa hida gu hhoige. Teesaaqay see, daqa hhaka'ay gwaa papa'ee haa goóba /imba Kristu, wantaaba idoo lensee da hhoi. Sa gimba, ilahudaa gu muunaiñ koina haa tana/oo koina digaa tlufu'umisi. ¹⁶ Inay yoóti kaayay tuba, Iliitleemu gu khuiyay, tay yondu giyoó yondiidiyeei, yoó tosii laqaaqana tuba, Iliitleemu giyaati tlankiri sumuku. Hida hanki digoó waki, yoó akhamisiyaa'iiba, coko/o see hiidahhasiyaa'iiba yondu lensee gu hhou.

2

Caacaahhamisu gu lou duguni slai kanisasu-uge

¹ Ugu kwanda ga caacaahhamiside gimbaka'a kilesi gu lou, goó daqa Iliitleemu dahha.

² Caacaahhamisi gaduũ, konee ilakhua, konee muree, konee waaway haa gwaa hii'atlee /imbage, sla'amuuge haa hiikaasage.

³ Nama teesaaqay leẽ, caacaahhamisi gaduũ gu tigay, konee ibinaa daa tlinti'isi, hhanti ili-itlohhiidiyay, hhanti hhareediyay, hhanti ooni-imidiyay. Inay kwanda gi caacaahhamisiyee hida gimba gu hhou. ⁴ Teesaaqay hiidahhasiyay caacaahhamisu tigay gu kahhee sagameeru, ma slairi hhawatee koina haã ya'ay koina.

⁵ Inay hiti ibiidiyee hari waaway hingigi ga/ayay, gii tlinti'iyay tlakwaroo, gi yondiidiyay nara'a yondu gu maraai koina, gi ibiidiyay hhoínay, gi muriidiyay hhawatee koina, gimba gu Iliitleemu dugu hhanti belendeqesi ha heedi lensee.

⁶ Nama teesaaqay, ilakwikwihhi qaraiya, ma ibiidiri hari waaway hingigi ga/ay inay kilakoina.

⁷ Gimba googuu sliimaa, laqami ibinaa da hhoi, hida wakinay ma ilakesiri ibinatee toku. Caacaahhamisuu googuu, caacaahhamisi hida hari amoo daa tafa'adi daroo khawa muree. ⁸ Kara iliikoomii gimba gu lou kilesi, caacaahhamisu dooba ilawaamisuu ha hida. Teesaaqay hhakee seei goó tlatlankimee, digimaa ooyi ha ilamuree, sa gimba maa slayaaiba idoo lenseei da tlakwi da kaawaraa daqa doorii.

⁹ Caacaahhamisi tongimaii, ma muriidiri hari khisla looe dooina, kara magi muunaii booesiri gimba sliimaage giyoó yondiidiyee. Inay hhanti ilakiimisiiyay looe dooina, ¹⁰ kara hhanti fiisiyay idoo lenseei daqa dooina, ba/ay inay laqanee ibinaa da kooma muree, digima /mbi ha looe dooina. Hari amotee gimba sliimaage, inay haraa khayay daareesa daqa caacaahhamisu gu gimba gu Iliitleemuge Il-abu'umiisay goori.

Iliitleemu yoó ilabu'una hida tlakwaroogo

¹¹ Inkoo, hhoínay gu didiru gu Iliitleemu goó ilabu'uma hida goó dugungii tlaa'asi pandataa.

¹² Hari hhoínaykee kosi gu didiru, Iliitleemu hindoóti caacaahhamisi dandiray, ma siani tlakwaroo haa slahhaahhau gimba gu kooroti, kara gi

slayna ibinaa daa tafa'adi haa waaway hangigi ga'ayna, gi muriidana Iliitleemu koorotii da inkooge. ¹³ Ibiidane teesaaqay, qatlay ga ilii baqaaqamidane iliipa'aru goori daa /aafi haa balota'a Yeesu Kristu, ina gu Iliitleemu haa Ilabu'umiisay goori, dugumaay tlaa'asiye hari wanqamee. ¹⁴ Hingaa hadisi ina lenkosi ubee, /ambeenimoka'a pahha, ma dandi afigweedi tlakwaroogo haa ma dandi ilabuusli tlakwaroo sliimaago, ma hida kosi tleehhidani, goó slash-haahhaaee yondu gu hhou.* ¹⁵ Inkoo hagu sla'a, ugu ma caacaahhamisidi hida te'esii gimba sliimaa guū ilakaay, /atlisii muunaii gu hida, kara ilii/oo/i hida wakinay hari /uuru googu, giyaadimiisay gu kanisaa pahha. Teesaaqay dugu hhanti qooqiidi ha heedi lenseei.

3

Ibinaa da hhoi da hida gu Iliitleemu

¹ 13 Tiito, kwanda sigii slayde hida goō, ma itatiisiri hida gu koomee /uuru tawaalooge haa hida gu deni goó wariiqadimidee yondu gu sirikariinii, inay hingi ilakhuukhu'usiye, sa yondu sliimaa gu hhou. ² Kara inay hhanti wa-haahanay heedi lensee, hhanti naanaqamidiyay, slayee ibidinaa da /abi da hhoi, tay gi ibiidiyay aslaa'amee loi haa hida sliimaa.

* **2:14** 2:14 Hari iliawaraa ma'aana da afigweeda da hida, ma yondimiisee da Iliitleemu tleehhidiri, slime yu'udii kitaabuu gu Daareesoo 130:8; Hiica'araa 19:5; Hiislaslaw gu Sariyaa 4:20; 7:6; 1 Peetiro 2:9.

³ Dandiray qatlaykira gu waka'alee haati kahana bawmage, Iliitleemu gwaa itatiimisaniiba, dandaatii coraaridi, dandiray yaati tongimaii daa tawaalimi ha slahhaahhaau haa hha'aloo paslaapasloo da slaqoo. Balalu sliimaa handaati tlakwi, kara haati kona tloomu sa hida wakinay. Hangwaati wakaawakana, dandigi waki ha hida sliimaa, inay seei gigi wakani.

⁴ Gimati teesaaqay see, Iliitleemu ilabu'umiisay goori sindaa laqami hhoiney haa sla'amuu gosi, dugwaa ilii tlaa'asi, ⁵ hindaa ilabu'umi dandiray, sa gimba gu /awaariru gosi giyaa kone sa dandiray, yaati sa gimba gu yondu gooriiba gu hhou gaa yondiidani. Hindaati ilabu'umi hari amoo da ilabusla tlakwaroo doori laqwaloo doorii da cadii, kara hindaa hii/abeesi muunaii kotii hari /uuru gu Muuna gosi. ⁶ Iliitleemu hindaa ilii ku'usi Muunakee kosi hari cabuuma, hari amoo da Yeesu Kristu ilabu'umiisay goori. ⁷ Kara Iliitleemu hindaati faadi konaaba tlakwaroo hari amoo da hhoiney gosi gu didiru. Ina yaa laqi gimba goõ teesaaqay, ma aalini iliipa'aru gu ibinaa da taysa naqatloo giyaa uumi. ⁸ Gimbaki goõ sugwaa kaay guti lou, kara gu iliipa'aruu, ana sla'a ugu ma iliikonti hari /uuru gimbakee, sa hida hhakee gwaa qaasee /imba dooina daqa Iliitleemuge, ma hiikarahhiri yondu gu hhouge. Gimbaki guti hhou, kara ti kona faydaa daqa hidage.

⁹ Inkoo tlintiaw kabaaba/u gu bawma, catimisu gu umaii gu okookoiï gu kooma faadoo da tleedi, tlanka haa qwatla sa sariyaa da Musaa. Gimbaki sliimaa konaaba faydaa, kara iliiaayaaba

heedi lenseei. ¹⁰ Hida hhakee goó /simee deehoo tla/ã goorii, kwanda ugu hagi ilii/oo/ode, bere slaiyaaiba mawaraa, kwanda gi kara ilii/oo/ode da cadii, ma mayri teesaaqay lalaquu. Asunkuilee bere kahhiyay slaiyaaiba itatiisa, hangu mamaydee haa inay sumuku. ¹¹ Ugu ha khu'uda tuba, sagaiñ gu hida hhakee gu hhoiiba, yaa mayri gimba gu lou sa sirakomamidu gu afa'afuuma kilesi. Kara inay ti hida gu koomee tlakwaroo, hingaa /agitiniri hari tlakwaroo dooina.

Ilakaawa haa cehheemisuu gu hiifaakoo

¹² Qatlay gamaa ilii ya/abe daqa dooguu Ari-teema angamalee Tikiiko, hhoora la khayda booma da Nikapoolige, sa gimba ana haa sla'a khawaraa te'esii, ma ibiidi qatlay gu slehheeri gu koomee caaqwa. ¹³ Qatlay Seena, heedikira gu sariyaa haa Apoolo gimaa ilii waaudiye, iliiawakii hari /uuru googu, ma slayri idadu sliimaa, gi slaiyeei hhiyuma dooinay. ¹⁴ Sa gimba, hida koti kwanda hingi caacaahhamisiyee, mangii ca/asiri, ma yondiidiri yondu gu hhou, ma iliia'ayri qaqaw sa hida idadu gu kaari haa ma slayri ibinaa doóba dakusa /aamu.

¹⁵ Hida sliimaa gu Iliitleemu gu ti'ii waaree haa ana, dugwaani cehheemisi ugu, Tiito. Cehheemisi dene'ee koti goó, gu koomee /imba daqa Kristuge.

Inkoo firoom doyi na nahaã ambee, hhoiñay gu didiru gu Iliitleemu ibiidiyee haa unkuray gonkokunaa.

**Ilaʼimbidu Gu /abu hari Burungaisoo
Burunge: Ilaʼimbidu Gu /abu hari Burungaisoo
(Bible)**

copyright © 2019 Wycliffe Bible Translators, Inc.

Language: Burunge

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Feb 2024 from source
files dated 29 Jan 2022

5fd9f69c-03b6-5343-85b8-5043bec70185